



Broj: 01-50-1-15-42/04.
Sarajevo, 27. jula 2004.

ZAPISNIK

42. sjednice Predstavničkog doma
Parlamentarne skupštine Bosne i Hercegovine

42. sjednica održana je 27. jula 2004. godine, s početkom u 10,10 sati. Prisustvovalo je 39 poslanika. Odsustvo su opravdali: Tihomir Gligorić, Zlatko Lagumdžija i Mladen Potočnik.

Iz Vijeća ministara prisustvovali su ministri Mirsad Kebo, Ljerka Marić, Branko Dokić i Dragan Doko.

Iz međunarodnih organizacija sjednicu su pratili Maja Ribar – OHR, Jelena Despot – EUPM i Jelena Dabić NDI.

U uvodnim napomenama predsjedavajući Doma Martin Raguz upoznao je poslanike o sjednici Kolegija u proširenom stastvu na kojoj je usaglašena dopuna ranije predloženog dnevnog reda, što su poslanici dobili na početku sjednice.

O prijedlogu dnevnog reda nije bilo rasprave, pa je predsjedavajući konstatirao da 42. sjednica ima sljedeći

DNEVNI RED

1. Zapisnici 39. i 40. sjednice Predstavničkog doma,
2. Poslanička pitanja i odgovori,
3. Izvještaj Komisije Kolegija o nastojanju za postizanje sporazuma o zahtjevu Vijeća ministara za razmatranje Prijedloga zakona o izmjenama i dopunama Zakona o ombudsmenu za ljudska prava Bosne i Hercegovine po hitnom postupku, u skladu s članom 104. Poslovnika,
4. Izvještaj Zajedničke komisije o nastojanju za postizanje sporazuma o identičnom tekstu Zakona o osnivanju Instituta za mjeriteljstvo BiH,
5. Izvještaj Zajedničke komisije o nastojanju za postizanje sporazuma o identičnom tekstu Zakona o osnivanju Instituta za standardizaciju BiH,
6. Zahtjev Vijeća ministara za razmatranje Prijedloga zakona o utvrđivanju i načinu izmirenja unutarnjeg duga Bosne i Hercegovine po hitnom postupku, u skladu s članom 104. Poslovnika,
7. Zahtjev Vijeća ministara za razmatranje Prijedloga zakona o državnoj graničnoj službi po hitnom postupku, u skladu s članom 104. Poslovnika,
8. Zahtjev Vijeća ministara za razmatranje Prijedloga zakona o nadzoru i kontroli prelaska državne granice po hitnom postupku, u skladu s članom 104. Poslovnika,
9. Prijedlog zakona o sjemenu i sadnom materijalu poljoprivrednih biljaka Bosne i Hercegovine (prvo čitanje),
10. Prijedlog zakona o fitofarmaceutskim sredstvima Bosne i Hercegovine (prvo čitanje),
11. Prijedlog zakona o mineralnim gnojivima (prvo čitanje),
12. Prijedlog zakona o zaštiti novih sorti biljaka Bosne i Hercegovine (prvo čitanje),
13. Prijedlog zakona o javnim nabavkama Bosne i Hercegovine (prvo čitanje),

14. Prijedlog zakona o izmjenama i dopunama Zakona o administrativnim taksama (prvo čitanje),
15. Prijedlog zakona o izmjeni Zakona o privremenom odgađanju od izvršenja potraživanja na osnovu izvršnih odluka na teret Budžeta institucija Bosne i Hercegovine i međunarodnih obaveza Bosne i Hercegovine (prvo čitanje),
16. Prijedlog zakona o Agenciji za unapređenje stranih investicija u Bosni i Hercegovini (prvo čitanje),
17. Prijedlog zakona o hrani (prvo čitanje),
18. Prijedlog zakona o nadzoru nad tržištem Bosne i Hercegovine (prvo čitanje),
19. Prijedlog zakona o tehničkim zahtjevima za proizvode i ocjenjivanju usklađenosti (prvo čitanje),
20. Prijedlog zakona o općoj sigurnosti proizvoda (prvo čitanje),
21. Prijedlog zakona o izmjenama i dopunama Zakona o putnim ispravama Bosne i Hercegovine (prvo čitanje),
22. Prijedlog zakona o Javnom radiotelevizijskom sistemu Bosne i Hercegovine (prvo čitanje),
23. Prijedlog zakona o Javnom radiotelevizijskom servisu Bosne i Hercegovine (prvo čitanje),
24. Prijedlog okvirnog zakona o registraciji poslovnih subjekata u Bosni i Hercegovini (prvo čitanje),
25. Prijedlog zakona o dopuni Zakona o državljanstvu Bosne i Hercegovine (prvo čitanje) – predlagač poslanik Nikola Špirić,
26. Prijedlog zakona o izmjeni Izbornog zakona Bosne i Hercegovine – predlagač poslanik Muhamed Moranjkić, sa Izvještajem Ustavno-pravne komisije,
27. Prijedlog zakona o izmjenama i dopunama Zakona o Vanjskotrgovinskoj komori Bosne i Hercegovine (predlagač poslanik Momčilo Novaković) sa Izvještajem Komisije za vanjsku trgovinu i carine,
28. Prijedlog zakona o pomilovanju (prvo čitanje),
29. Izvještaj Istražne komisije za utvrđivanje istine u vezi s akcijom SFOR-a u Palama,
30. Prijedlog projekta za utvrđivanje trošenja donatorskih sredstava,
31. Izbor jednog člana Visokog sudskog i tužilačkog vijeća Bosne i Hercegovine.

Ad – 1: Zapisnici 39. i 40. sjednice Predstavničkog doma

Na zapisnike nije bilo primjedbi.

Dom je jednoglasno usvojio zapisnike 39.i 40. sjednice.

Ad – 2: Poslanička pitanja i odgovori

Predsjedavajući Raguž sugerirao je da se poslanička pitanja ostave za 43. sjednicu, s obzirom na obimnost dnevnog reda.

Milorad Žvković predložio je da poslanici pitanja koja su pripremili predaju u pisanoj formi, bez iznošenja usmenog obrazloženja.

Ove sugestije su prihvaćene.

Pitanja u pisanoj formi predali su poslanici kako slijedi:

Vinko Zorić:

1. «Ko su članovi komisija (domaći eksperti) koji pripremaju zakone na nivou Bosne i Hercegovine?

2. Isto pitanje i za nivo FBiH ako postoji!

Obrazloženje: Ovo pitam jer za komisije nisam znao. Saznanje o postojanju tih komisija dobio sam iz Izvješća koje sam dobio od službi Parlamentarne skupštine, a odnosi se na izlaganje kolege Elmira Jahića u Strasbourgu 23.juna 2004.»

Adem Huskić:

«Zbog čega se pri prometu automobila (ne odnosi se na prvu prodaju) mijenjaju registarske tablice ako one nisu vezane za mjesto izdavanja? (Predlažem VM da donese propis koji će omogućiti da registarske tablice budu vezane za automobil bez obzira što se mijenja vlasnik, kakva je praksa u nekim evropskim zemljama)».

Elmir Jahić:

«U kojoj fazi realizacije se nalazi Sporazum o sukcesiji imovine ex Jugoslavije, odnosno da li je imovina koja je ovim sporazumom pripala našoj državi, uključujući i imovinu biše JNA, uknjižena u državno vlasništvo kako nalaže Sporazum?»

Milorad Živković:

«Je li Vijeće ministara razmatralo Sporazum o razumijevanju između BiH i Svjetske banke i da li je stavilo svoj potpis na ovaj sporazum?»

Nikola Kragulj:

«Već duže vrijeme traje zabrana uvoza mesa i mesnih prerađevina u Bosnu i Hercegovinu iz Srbije i Crne Gore zbog sprečavanja unosa zaraznih bolesti slinavke i šapa i plavog jezika. Početkom ovog mjeseca stručna veterinarska grupa u okviru Mješovite komisije BiH i SiCG za praćenje provođenja Sporazuma o slobodnoj trgovini usaglasila se da su prestali razlozi za daljnju zabranu uvoza ove robe, u kom smislu je Ured za veterinarstvo BiH dao prijedlog Ministarstvu vanjske trgovine i ekonomskih odnosa.

Pitam – zašto se skidanje zabrane odgađa, odnosno kada će zabrana biti skinuta?»

Selim Bešlić:

«Do kada će se okončati radovi ispred skupštinske zgrade – plato, jer intenzitet radova ukazuje da bi se moglo ući u zimski period, kada su uslovi za izvođenje radova veoma teški. Također me interesira kolika je cijena ugovorenih radova i ko je od izvođača dobio posao? Odgovor tražim od ugovarača sa izvođačem radova».

Ad – 3: Izvještaj Komisije Kolegija o nastojanju za postizanje sporazuma o zahtjevu Vijeća ministara za razmatranje Prijedloga zakona o izmjenama i dopunama Zakona o ombudsmenu za ljudska prava BiH po hitnom postupku, u skladu s članom 104. Poslovnika

Predsjedavajući je podsjetio poslanike na Izvještaj o usaglašavanju te da je u Komisiji Kolegija postignuta saglasnost o zahtjevu Vijeća ministara za razmatranje Prijedloga zakona o izmjenama i dopunama Zakona o ombudsmenu za ljudska prava Bosne i Hercegovine po članu 104. Poslovnika Doma, o čemu se Dom obavještava u skladu s članom 65. stav 3. Poslovnika.

Ad – 4. i 5.

Dom je usvojio izvještaje Zajedničke komisije o nastojanju za postizanje sporazuma o istovjetnom tekstu zakona, pa su tako i u Domu konačno usvojeni:

- Zakon o osnivanju Instituta za mjeriteljstvo BiH i
- Zakon o osnivanju Instituta za standardizaciju BiH.

Ad – 6. do 8.

U okviru ovih tačaka nije bilo rasprave, pa je Dom usvojio zahtjeve Vijeća ministara da se po članu 104. Poslovnika razmatraju:

- Prijedlog zakona o utvrđivanju i načinu izmirenja unutrašnjeg duga Bosne i Hercegovine (33 glas za, 2 uzdržana),
- Prijedlog zakona o državnoj graničnoj službi BiH (jednoglasno – 35 glasova) i
- Prijedlog zakona o nadzoru i kontroli prelaska državne granice BiH (jednoglasno – 34 glasa).

Ad – 9: Prijedlog zakona o sjemenu i sadnom materijalu poljoprivrednih biljaka Bosne i Hercegovine (prvo čitanje)

Momčilo Novaković dao je primjedbu na Izvještaj Ustavno-pravne komisije, rekavši da je njegov amandman na Komisiji usvojen u cjelini, ali da u Izvještaju nije prenesen onako kako je usvojen.

Povodom ove primjedbe diskutirali su Mirsad Ćeman i Martin Raguž, nakon čega je intervencija Momčila Novakovića prihvaćena, tj. potvrđeno je da u Izvještaju treba da stoji da je amandman usvojen u formi kako je podnesen. Zatim je Dom jednoglasno usvojio Prijedlog zakona u prvom čitanju.

Sa 31 glasom za, jednim protiv i jednim uzdržanim, usvojen je prijedlog predsjedavajućeg da se Prijedlog zakona razmatra i u drugom čitanju.

U drugom čitanju nije bilo rasprave. Dom je jednoglasno (u momentu glasanja prisutna 33 poslanika) usvojio Zakon o sjemenu i sadnom materijalu poljoprivrednih biljaka BiH.

Ad – 10. do 15.

Dom je prijedloge zakona iz navedenih tačaka razmatrao i u prvom i u drugom čitanju. Nije bilo rasprave, pa su usvojeni:

- Zakon o fitofarmaceutskim sredstvima BiH (jednoglasno),
- Zakon o mineralnim gnojivima (jednoglasno),
- Zakon o zaštiti novih sorti biljaka BiH (jednoglasno),
- Zakon o javnim nabavkama (34 za, 1 protiv),
- Zakon o izmjenama i dopunama Zakona o administrativnim taksama (jednoglasno) i
- Zakon o izmjeni Zakona o privremenom odgađanju od izvršenja potraživanja na osnovu izvršnih odluka na teret Budžeta institucija BiH(za 34, protiv 1, uzdržan 1).

Ad – 16. Prijedlog zakona o Agenciji za unapređenje stranih investicija u Bosni i Hercegovini (prvo čitanje)

Azra Hadžiahmetović dala je konkretne primjedbe na Prijedlog zakona i izrazila žaljenje što nije bila u mogućnosti da u komisijskoj fazi uloži amandmane i prisustvuje sjednici nadležne komisije. Predložila je da se omogući ulaganje amandmana kako bi se tekst Prijedloga zakona popravio.

U daljnjoj diskusiji učestvovali su: Seada Palavrić, Selim Bešliagić, Momčilo Novaković, Šefik Džaferović, Petar Kunić, Fatima Leho, kao i ministar Dragan Dokić.

Nakon rasprave usvojen je zaključak (za glasalo 20, protiv 13 – iz FBiH za 15, iz RS 5) da se omogući nova komisijska faza i ulaganje amandmana, te da nadležna komisija sačini novi izvještaj, nakon čega će se (na narednoj sjednici) Prijedlog zakona razmatrati i u prvom i u drugom čitanju.

Ad – 17. i 18.

Prijedlozi zakona iz 17. i 18. tačke također su razmatrani i u prvom i u drugom čitanju. Nije bilo rasprave pa je Domu svojio:

- Zakon o hrani - sa 33 glasa za i 1 uzdržanim i
- Zakon o nadzoru nad tržištem – također 33 glasa za i 1 uzdržan.

Ad – 19: Prijedlog zakona o tehničkim zahtjevima za proizvode i ocjenjivanju usklađenosti (prvo čitanje)

Marija Perkanović kazala je da u članu 6. tačka 3. postoji nedorečenost, pa je zatražila objašnjenje.

Ministar Dragan Doko odgovorio je da je primjedba opravdana i da se radi o tehničkoj grešci što treba ispraviti dodavanjem teksta koji je rekao.

Ovim povodom diskutirali su: Fatima Leho, Petar Kunić i Šefik Džaferović, nakon čega je data pauza kako bi nadležna komisija zasjedala i usaglasila ispravku teksta u stavu 3. člana 6.

Poslije pauze predsjedavajući Komisije Petar Kunić usmeno je izvijestio Dom da je Komisija prihvatila primjedbu i dodavanje teksta koji je ministar Dragan Doko pročitao prethodno na sjednici.

Dom je prihvatio Izvještaj predsjedavajućeg Komisije za vanjsku trgovinu i carine, pa je Prijedlog zakona usvojen jednoglasno u prvom čitanju. Zatim je usvojen i prijedlog za njegovo razmatranje u drugom čitanju.

U drugom čitanju nije bilo rasprave. Sa 33 glasa za i 1 uzdržanim usvojen je Zakon o tehničkim zahtjevima za proizvode i ocjenjivanje usklađenosti.

Ad – 20. i 21.

Prijedlozi zakona iz 20. i 21. tačke razmatrani su i u prvom i u drugom čitanju. Nije bilo rasprave, pa su usvojeni:

- Zakon o općoj sigurnosti proizvoda – sa 36 glasova za i 1 uzdržanim i
- Zakon o izmjenama i dopunama Zakona o putnim ispravama BiH – sa 33 glasa za, 1 protiv i 2 uzdržana.

Ad – 22: Prijedlog zakona o Javnom radiotelevizijskom sistemu Bosne i Hercegovine (prvo čitanje)

Ministar Branko Dokić podnio je uvodno izlaganje istovremeno o Prijedlogu zakona o Javnom RTV sistemu i o Prijedlogu zakona o Javnom RTV servisu.

O Prijedlogu zakona vođena je duga rasprava u kojoj su učestvovali: Beriz Belkić, Vinko Zorić, Filip Andrić, Ivo Miro Jović, Seada Palavrić, Azra Hadžiahmetović, Momčilo Novaković, Nikola Špirić, Selim Bešlić, Ruža Sopta, Milorad Živković, Jelina Đurković, Jozo Križanović, Miloš Jovanović, Sead Avdić, Martin Raguž i Fatima Leho. Na određene primjedbe odgovorio je ministar Branko Dokić.

Nakon rasprave predsjedavajući Martin Raguž napomenuo je da je na Prijedlog zakona uložena velika broj amandmana, pa je Prijedlog zakona dao na glasanje u prvom čitanju.

Sa 31 glasom za, 6 protiv i 1 uzdržanim (iz Federacije BiH za j 18, iz RS 13) usvojen je Prijedlog zakona o Javnom RTV sistemu u prvom čitanju.

Ad – 23: Prijedlog zakona o Javnom radiotelevizijskom servisu Bosne i Hercegovine (prvo čitanje)

U kratkoj diskusiji Filip Andrić rekao je da smatra da je iscrpljena rasprava o načelima i o ovom zakonskom prijedlogu u prethodnoj tački a kada se bude raspravljalo u drugom čitanju on će

obrazložiti svoje namandmane. Drugih diskusija nije bilo, pa je predsjedavajući Prijedlog zakona dao na glasanje.

Sa 29 glasova za, 6 protiv i 3 uzdržana (iz FbiH za 16, iz RS 13) usvojen je Prijedlog zakona o Javnom RTV servisu u prvom čitanju.

Ad – 24: Prijedlog okvirnog zakona o registraciji poslovnih subjekata u Bosni i Hercegovini (prvo čitanje)

U prvom čitanju nije bilo rasprave. Sa 31 glasom za, 2 protiv i 3 uzdržana Prijedlog zakona je u prvom čitanju usvojen. Također je usvojen prijedlog predsjedavajućeg da se ovaj zakonski prijedlog razmatra i u drugom čitanju.

Predsjedavajući je napomenuo da je Ivo Miro Jović podnio dva amandmana.

Ivo Miro Jović obrazložio je amandmane.

Mirsad Ćeman je u diskusiji osporio amandmane Ive Mire Jovića i, pored ostalog, rekao da će Prijedlog zakona prihvatiti sa Izvještajem Ustavno-pravne komisije.

Poslije diskusije Mirsada Ćemana, Ivo Miro Jović povukao je amandmane.

Sa 29 glasova za i 6 uzdržanih usvojen je Okvirni zakon o registraciji poslovnih subjekata.

Ad – 25: Prijedlog zakona o dopuni Zakona o državljanstvu Bosne i Hercegovine (prvo čitanje) – predlagač poslanik Nikola Špirić

U okviru ove tačke nije bilo rasprave, pa je predsjedavajući Prijedlog zakona dao na glasanje.

Sa 17 gasova za, 14 protiv i 3 uzdržana Prijedlog zakona o dopuni Zakona o državljanstvu usvojen je u prvom čitanju. Usvojen je i prijedlog predsjedavajućeg da se Prijedlog zakona razmatra i u drugom čitanju.

Prilikom glasanja u drugom čitanju Prijedlog zakona nije dobio većinu. Za je glasalo 16, protiv 18 poslanika.

Ad – 26: Prijedlog zakona o izmjeni Izbornog zakona Bosne i Hercegovine – predlagač poslanik Muhamed Moranjkić, sa Izvještajem Ustavno-pravne komisije

Predsjedavajući Doma u uvodnim napomenama podsjetio je poslanike da nadležna komisija nije podržala principe predloženog zakona, kao i na odredbe kojim je reguliran postupak u slučaju kada je izvještaj Komisije negativan.

Kratko je diskutirao predlagač Zakona Muhamed Moranjkić. Nakon diskusije, predsjedavajući je na glasanje dao Izvještaj Ustavno-pravne komisije.

Za Izvještaj glasalo je 26, protiv 2, uzdržao se jedan poslanik.

Predsjedavajući je konstatirao da je Izvještaj Komisije usvojen i da se Prijedlog zakona o izmjeni Izbornog zakona BiH smatra odbijenim.

Ad – 27: Prijedlog zakona o izmjenama i dopunama Zakona o Vanjskotrgovinskoj komori Bosne i Hercegovine (predlagač poslanik Momčilo Novaković) sa Izvještajem Komisije za vanjsku trgovinu i carine

U okviru ove tačke nije bilo rasprave.

Poslije kratkih uvodnih napomena predsjedavajućeg, Dom se izjasnio o Izvještaju Komisije za vanjsku trgovinu i carine.

Za Izvještaj glasala su 23, a protiv 9 poslanika. Iz FBiH za su glasala 22, a iz RS jedan poslanik.

Kako nije bilo entitetske većine, provedno je usaglašavanje u Kolegiju kao Komisiji, kojom prilikom nije postignuta saglasnost.

U drugom krugu glasanja iz Republike Srpske protiv je glasalo 11 poslanika, što je više od 2/3.

Predsjedavajući Martin Raguž konstatirao je da Izvještaj Komisije nije usvojen i da Prijedlog zakona o Vanjskotrgovinskoj komori BiH ide u daljnju proceduru, te da se nadležnoj komisiji određuje rok da do naredne sjednice dostavi novi izvještaj.

Ad – 28: Prijedlog zakona o pomilovanju (prvo čitanje)

U kraćim uvodnim napomenama predsjedavajući je rekao da je na ovu sjednicu Prijedlog zakona uvršten na Proširenom kolegiju radi ažurnosti, s obzirom na godišnji omor, pa su stoga poslanici danas dobili Izvještaj nadležne komisije.

Vinko Zorić prigovorio je da on nije ni dobio Izvještaj, a predsjedavajući je zatražio da se Zoriću Izvještaj odmah dostavi, što je i učinjeno.

O Prijedlogu zakona nije bilo rasprave. Sa 35 glasova za i jednim uzdržanim Prijedlog zakona usvojen je u prvom čitanju. Usvojen je i prijedlog predsjedavajućeg da se ovaj zakonski prijedlog razmatra i u drugom čitanju. Sa 31 glasom za, 1 protiv i 4 uzdržana (iz F BiH za 22, iz RS 9) usvojen je Zakon o pomilovanju.

Ad – 29: Izvještaj Istražne komisije za utvrđivanje istine u vezi s akcijom SFOR-a na Palama

U ime Istražne komisije Izvještaj je obrazložio Ivo Miro Jović, predsjedavajući Komisije. Zatim je govorila i Liljana Milićević, član Komisije.

U raspravi su učestvovali: Momčilo Novaković, Milorad Živković i Seada Palavrić.

Poslije diskusije predsjedavajući je na glasanje dao Izvještaj Istražne komisije, s prijedlogom zaključka koji je predložila Seada Palavrić i podržala Liljana Milićević – da se sa Izvještajem upoznaju zemlje članice SFOR-a čiji su vojnici učestvovali u akciji, radi preduzimanja mjera za učinjena djela, u skladu s odredbama potpisanim u Dejtonu.

Sa 30 glasova za i 5 uzdržanih usvojen je Izvještaj Istražne komisije s predloženim zaključkom.

Ad – 30: Prijedlog projekta za utvrđivanje trošenja donatorskih sredstava

U okviru ove tačke diskutirali su: Azra Hadžiahmetović, Hazim Felić, Selim Bešlić, Momčilo Novaković, Jozo Križanović, Seada Palavrić, Liljana Milićević i Munib Jusufović.

Kako su u diskusiji izražena suprotna mišljenja u vezi s Projektom, predsjedavajući je predložio zaključak – da se da' novi rok od 30 dana Istražnoj komisiji za utvrđivanje trošenja donatorskih sredstava da izvrši dodatne konsultacije u Vijeću ministara u vezi s Prijedlogom projekta Bosne i Hercegovine, kako bi se utvrdila realnost Projekta i mogućnost njegovog izvršenja.

Za zaključak je glasalo 15, protiv 11, uzdržalo se 5 poslanika – iz Federacije BiH za je glasalo 12, iz RS 3.

Predsjedavajući je konstatirao da Prijedlog zaključka nije dobio entitetsku većinu i da će se, zbog odsustva jednog člana Kolegija, usaglašavanje provesti naknadno.

Ad – 31: Izbor jednog člana Visokog sudskog i tužilačkog vijeća
Bosne i Hercegovine

U uvodnim napomenama predsjedavajući Martin Raguž podsjetio je poslanike da, prema Zakonu o Visokom sudskom i tužilačkom vijeću, jednog člana tog vijeća bira Predstavnički dom, te da, s obzirom na ukupnu strukturu, Dom treba da izabere jednog člana iz reda bošnjačkog naroda.

Miloš Jovanović izrazio je dilemu da je Zakonom propisano da visoki predstavnik imenuje 13, a Vijeće ministara i Predstavnički dom po jednog člana.

Predsjedavajući Doma odgovorio je da je odredba Zakona jasna, te da je Vijeće ministara već imenovalo jednog člana. Zatim je na glasanje dao prijedlog kandidata.

Sa 26 glasova za, jednim protiv i jednim uzdržanim, za člana Visokog sudskog i tužilačkog vijeća izabran je **Zahid Kovač**.

Ovim je realiziran dnevni red 42. sjednice.

Sjednica je završena u 20,50 sati.

Sastavni dio Zapisnika je transkript 42. sjednice Predstavničkog doma.

SEKRETAR
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
Martin Raguž